

經文：希伯來書 5:5-10

咱教會 ka 重視聖誕節忽略復活節。親像咱 ka 重視待降節忽略大齋節全款。其實耶穌降生只有兩本福音書有記載，耶穌復活四卷福音書 lóng 有記載，總是 tī 福音書中，至少有三分之一篇幅是專注 tī 耶穌生命中 siōng 高潮 ê 最後一程。伊 siōng 續尾所行 ê 每一步，lóng 有 hō 人料想 bei 到 ê 力量，soah 致到徹底改變人類 ê 歷史。死亡是耶穌 ê 中心奧秘，ná 親像保羅所講：設使耶穌無復活，an-ni 伊所傳 ê 是空空。大齋節 kap 待降節 lóng 是用紫色，紫色代表準備 kap 悔改。待降節只有 3-4 個禮拜，大齋節前後雖然是 40 天，總是不包含其中六個禮拜日。大齋節期 tī 天主教稱作四旬期(Quadragesima)，信義宗稱作預苦期。大齋期是由大齋頭一工(聖灰日)開始到復活節前一工為止，總共四十工(不計算主日)。四十工 ê 起源是 tī 耶穌受洗了後，到曠野禁食又贏過魔鬼 ê 試探。今年 ê 聖灰日 tī 3 月初 1，所以今 á 日是大齋節第五主日，下禮拜是棕樹主日，耶穌光榮入城，ma 是大齋節第六主日。

今 á 日 ê 經文是希伯來書作者寫 hō 受迫害 ê 基督徒，tī 說明基督是上帝 ê kiáⁿ 兒 siōng 真實 kap 完整 ê 啓示。作者由三方面來敘述：

1. 無 thang 比擬 ê 基督：耶穌是上帝 ê kiáⁿ 兒，作者用 12 次 ê kiáⁿ 兒來形容耶穌。伊忍受痛苦，順服老父 ê 旨意。因為伊經歷過一般人 ê 試探，伊 koh-khah ē-tàng 幫助咱對付試探。
2. 上帝立基督作永遠 ê 祭司，贏過所有 ê 祭司，伊 ê 地位比天使、摩西 iáu ka 高。今 á 日 ê 經文就是 tùi-an-ni 來 ê。
3. 上帝 ê 恩典 hō 咱只要相信基督，咱就 ê thang 從罪惡和死亡中拯救出來，得 tiòh 永生，大齋節就是 tī 紀念耶穌為咱捨命。

聖誕節時咱 lóng 愛吟韓德爾 ê 彌賽亞來迎接主 ê 誕生，其實這首神劇是 tī tē 預言耶穌 ê 誕生、傳道、受難 kap 復活 ê 一生，尙續尾 tī 「阿利路亞」大合唱 o-ló ê 聲中，基督榮耀又再臨。我今 á 日就用女高音詠唱 ê 第四十五曲「我知影我 ê 救主活著」作題 kap 兄姊同齊來思考主耶穌基督為 tiòh 行十字架道路，伊按怎 ê 謙卑，順服來完成救贖人類 ê 使命。

1. 謙卑(V.7)：每人 lóng 有家己意愛 ê 經文 kap 愛吟 ê 詩歌。Chit 擺 tng 台灣，去韻順唱片公司，頭家 kā 我講伊近來真愛 Maurice Durufle (1902-1986) ê 安魂曲，伊 kā 太太講伊葬禮 ê 時就播這首安魂曲。對我來講，故人 siōng 愛 ê 經文是腓立比書 2:5-11。Tī chit 段經文內底表現出耶穌 ê 謙卑。伊本有上帝 ê 形狀，無掠 kap 上帝平等做所 tiòh 執守 ê，反 tng piàⁿ 空家己，取奴僕 ê 形狀，成做人 ê 樣相；已經有親像人 ê 款式，就屈家己，順服到 tī 死，甚至死 tī 十字架。所以上帝高升伊極高，賞賜伊 hit-ê 名，pōaⁿ 過 tī 萬名 ê 頂面 ê； hō 見若 tī 天，tī 地，kap tī 地下 ê，tī 耶穌 ê 名，無一個腳頭 u m̄ 跪拜，無一個嘴 m̄ 稱呼耶穌基督做主，來歸榮光父上帝。這就是復活得榮 ê 奧秘：伊必先進入謙卑受侮辱到極深 ê 所在，chiah ē-tàng 進入到榮耀 ê siōng 高處。Tī 棕樹主日伊以王者 ê 身份騎驢 ah 入城，竟然 tī 最後晚餐 ê 時，àⁿ 腰 khū 落去為學生洗腳，這算什麼王 ê 派頭 neh? 原來伊 ê 國度是建立 tī tē 服事 kap 謙卑 ê 根基上面。這 ma 是耶穌 tī 福音書 ê 教示：凡若自高 ê，beh hō 伊卑微；家己卑微 ê，beh 高升伊。(太 23:12，路 14:11，18:14) 耶穌 m̄-nā 教示咱，伊家己

ma 實踐，伊講：lín 要彼此洗腳，彼此服事，彼此相愛，人就知影 lín 是我 ê 學生。

2. 順服(V.8)：「雖然伊是上帝 ê kiáⁿ 兒，猶原 tùi 伊所受 ê 苦難學習順服。」chit 節經文是指耶穌 tī 客西馬尼園 ê 祈禱，這是一 ê 祈禱 bô 受應允 ê 故事，痛苦 ê 杯並無除去。路加福音 22:42 耶穌祈禱講：『父 ah,你若肯，tiòh 將 chit-ê 杯離開我；獨獨 m̄ 是我 ê 意思，是你 ê 意思 tiòh 成。』上帝敢有聽見耶穌 ê 祈禱 mah?我想伊是有聽見 lah, m̄-koh 耶穌 tī 極大 ê 痛苦中，koh-khah 迫切祈禱，伊 ê 汗是親像大點血滴落地。落尾耶穌順服上帝 ê 安排去承受苦難，勇敢向殺害伊 ê 烏暗行去。客西馬尼園 siōng 困難 ê 是耶穌面對 ê 孤單，伊完全體會 tiòh 人 tī 靈裡 kap 肉體之間 ê 爭戰，人 ê 肉體是何等 ê 軟弱，基督徒 ê 事奉過程往往會 tú-tiòh 煩悶孤單 ê 時 chūn, 咱需要同工、屬靈同伴、彼此 ê 代禱來相 kap 支持，chiah ē-tàng 贏過客西馬尼園困眠 ê 試鍊。
3. 救贖(V.9)：tī 20 世紀中期法國神學家 Oscar Cullman(1902-1999)kā 聖經看作上帝對人類 ê 拯救史。Chit-ê 傳統互大部份 ê 聖經學者接受，1992 年舊約學者 Walter Bruegemann 用見證來解釋上帝佇以色列人 ê 存在，In 是上帝 ê 同伴。他們要將上帝佇她們中間 e 恩典傳達出來。舊約時期 ê 傳達者 (mediator) 有士師、君王、先知 kap 祭司。上帝怎樣 ài kā 恩典傳 hō 人 neh?照 Bruegemann ê 看法是伊要 kap 整個受造者有關係。以色列 ê 祭司分做普通祭司 kap 大祭司。大祭司是上帝 kap 人中間 ê 傳達者，伊 kā 上帝 ê 恩典傳 hō 以色列百姓，又 kā 以色列百姓 ê 悔改 kap 感謝傳達 hō 上帝。大祭司 ê 職責 tī 贖罪日 siōng ē-tàng 表現出來，按照利未記 16:2 ê 記載，上帝對摩西講：「Tiòh kā 你 ê hiaⁿ 亞倫講：m̄-thang 隨便時入聖所 ê 帳籬內，到約櫃頂施恩所 ê 面前，免得死；因為我 beh tī 雲中顯現 tī 施恩所 ê 頂面。」tī 贖罪日，只有大祭司 chiah ē-tàng tī 施恩所為以色列百姓 kap 家己獻上贖罪祭。總是今 á 日 ê 經文：基督無為家己爭取作大祭司 ê 尊貴地位；反轉，上帝對伊講：你是我 ê kiáⁿ 兒；今 á 日我作你 ê 父。又講：照麥基洗德 e 班列。只有沒罪 e 基督做大祭司才 òe 替咱贖罪，也因為 an-ni 基督 e 贖罪一擺完成，咱 m̄ 免親像舊約時代同款每年守贖罪日。通過基督 thang 直接向上帝祈求，m̄ 免互祭司所控制，這 ma 是宗教改革時期 ê 改革者，馬丁路德等人提出萬民皆祭司 ê 信仰根據。所以咱每一位信徒 lóng 要立志扮演好祭司 ê 角色，換句話講，每個人要直接向上帝負責，教會牧長只 ē-tàng tùi 邊仔協助你建立信仰 ê 根基。

生活 tī 當今 ê 美國，咱有真豐盛 ê 物質生活，總是 tī 大齋節期，天主教徒每禮拜五禁食肉類。新教無規定，總是 mà 有 bô 唱哈利如亞 ê 傳統，也盡量不出外旅行或是舉行慶祝活動，基督徒要以賑濟、刻苦等方式認罪，親像：珊宇講伊今年放棄 pîn-tōaⁿ, tī 大齋節期每工運動。另外咱要以虔誠 ê 心來迎接主為著咱 ê 罪受難，並且用歡喜 ê 心情聽候耶穌基督 ê 復活。Tú 好這期 ê Times 雜誌講著地球暖化 ê 專題，實在值得咱反省。因為地球暖化，kui-ê 地球 tī 過去 100 年來氣溫增加 0.6 度。總是東京增加三度，因為 in tī 汐留海邊起真 chē 棟大樓，200 公尺 kap 100 公尺以上有 kúi-nā 棟，等於是東京 ê 長城，kā 海風阻擋 tī 外面，無法度吹入來陸地。民眾 koh-khah 使用冷氣，án-ne 成為惡性循環，結果氣溫 koh-khah 惡化。所以咱要盡量減少使用能源，若 beh 出門 kā 所有 ê t'ai-chì 一 pái 完成，mài 浪費汽油，若 ē-tàng 盡量合坐一台車 khah 省汽油，尙好是使用大眾運輸系統，設使行路 ē-tàng 到 ê 所在盡量行路。當上帝創造世界 ê 時，要人類做好管家，咱應該盡心盡力做好管家，chiah boe 辜負上帝 e 托付和主耶穌贖罪 ê 功勞。